



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Komunikadu Imprensa

4 Novembru 2013

JSMP kongratula selebrasaun Loron Nasionál ba Feto Timor Leste

Iha loron 3 fulan Novembru kada tinan, selebra nu'udar Loron Nasionál ba Feto Timór Léste. Loron ne'e, nu'udar loron importante ba comunidade feto iha Timór Léste, tanba hatu'ur loron ida ne'e hanesan Loron Nasionál. Kompromisu ida ne'e, hatudu katak Estadu Timor Leste, rekoñese importansia husi kontribuisaun, papel no partisipasaun feto iha kontestu konstrusaun no dezenvolvimentu nasionál.

Mesmu nune'e, durante esperiensa servisu monitorizasaun JSMP nian, JSMP deskobre katak, maioria kazu sira ne'ebé rejista no julga iha tribunál sei kontinua domina husi kazu ne'ebé asociadu ho forma violénsia bázeia ba jéneru, ne'ebé maioria involve feto no labarik feto hanesan vítima.

Krime hirak ne'e inklui violénsia doméstika, violasaun seksuál no abuzu seksuál hasoru menór feto ho natureza incestu, abandona no natureza krime sira seluk ne'ebé bele fó impaktu ba dezenvolvimentu nasionál no fó todan/pezu ba responsabilidade nasaun iha futuru.

JSMP kongratula comunidade feto sira no komponente sosiedade tomak ne'ebé halo parte ba movimentu luta hodi "hateten lae ba violénsia doméstika," dehan Direktór Ezekutivu JSMP Luis de Oliveira Sampaio.

JSMP hein katak liu husi selebrasaun Loron Nasionál Feto Timor Leste ne'e, fó biban ba komponente sosiedade Timór Léste tomak hanoin no reflète saida mak presiza hametin diak liu tan iha futuru atu asegura katak feto no mane hamutuk servisu ba dezenvolvimentu nasionál.

JSMP mós ezije ba orgaun estadu sira, liu-liu governu atu hari'í sistema no dezenvolve polítika ida ne'ebé responsivu hodi garante protesaun adekuada ba feto sira.

JSMP konsiente katak comunidade feto sira, iha área rurais, sei nafatin hasoru dezafiu estruktural oi-oin atu defende sira nia direitu konstitusional, tanba influensia husi prátika kostume lokal ne'ebé mak dala barak diskrimina, ignora no prejudika sira nia direitu, mesmu Konstitusaun RDTL, la fo fatin ba prátika diskriminativu hirak ne'e, liuliu asegura feto nia partisipasaun iha kualker vida nasaun nian no asegura katak feto sira livre husi kualker forma violensia hasoru feto. Mesmu sei iha servisu boot iha oin, JSMP kontinua enkoraja ema hotu atu labele lakon espiritu hodi hateten lae ba violénsia doméstika.

Atu hetan informasaun kle'an, favor kontaktu:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.minihub.org
info@jsmp.minihub.org
Telefone:3323883 | 77295795
Website: www.jsmp.tl
Face book: www.facebook.com/timorleste.jsmp
Twitter: @JSMPtl